


Jenazah bekas KSN dibawa pulang ke Malaysia Isnin ini

Oleh [Nor Azizah Mokhtar](#) - April 23, 2022 @ 9:29am
bhnews@bh.com.my



KUALA LUMPUR: Jenazah bekas Ketua Setiausaha Negara, Tan Sri Dr Ali Hamsa yang meninggal dunia di Dublin, Ireland pada Khamis lalu akan dibawa pulang ke Malaysia pada Isnin ini untuk dikebumikan.

Jabatan Perdana Menteri dalam kenyataan, hari ini memaklumkan jenazah dijangka akan tiba di Lapangan Terbang Antarabangsa Kuala Lumpur (KLIA) pada jam 3 pagi.

"Jenazah akan dibawa ke Masjid Tuanku Mizan Zainal Abidin, Presint 3, Putrajaya untuk penghormatan terakhir di Dewan Sheikh Daud Al-Fathoni bermula dari jam 8 hingga 9.45 pagi.

"Jenazah kemudian akan disembahyangkan di Dewan Solat Utama pada jam 10 pagi sebelum dibawa ke Tanah Perkuburan Islam Presint 20, Putrajaya untuk dikebumikan," katanya.

Katanya, pelawat yang akan memberikan penghormatan terakhir dinasihatkan hadir mulai jam 8 hingga ke jam 9.45 pagi sebelum jenazah dibawa ke Tanah Perkuburan Islam Presint 20, pada jam 10.15 pagi.

Allahyarham dilahirkan pada 29 Ogos 1955 di Kluang, Johor dan meninggal dunia pada usia 67 tahun.

Ketua Setiausaha Negara ke-13 itu meninggal dunia pada Khamis lalu bersamaan 19 Ramadhan 1443H ketika menerima rawatan di Hospital Dublin, Ireland.